

թիւնը տիրամօր պատիժներից մէկը: Որքան ճիշտ էր այդ կարծիքը, ես չգիտէի, բայց ես գիտէի մի բան, թեւ որպէ՛ս Ստեփանի հայրը չարաչար կերպով վարուում էր նրա հետ, որպէ՛ս նրա երեխայութեան ժամանակ, իբրեւ պատիժ, կախ էր տոնել խեղճ տղային ջրի հորի մէջ, նա մնացել էր այնտեղ կէս ժամ, եւ այնուհետեւ Ստեփանի խեղքը տեղը չեկաւ. նա միշտ ցնորուում էր, երբ ջուր կամ հօր էր տեսնում....: Այս ես գիտէի...

Ես շատ ուրախ էի, որ գնալով մօրս մօտ, քեռի Պետրոսի վրանը, չհանդիպեցայ վարժապետիս: Ինձ խիստ անտանելի էր միւս անգամ տեսնել այն մարդու երեսը, որը այնքան դառն ցաւերի պատճառ էր եղել ինձ:

Հասնելով մեր վրանը, գտանք պառաւ խաթունին եւ Մարգարիտին քնած. Մարօն արթուն նստած սպասում էր ինձ:

Ես չեմ կարող նկարագրել այն ուրախութիւնը, որով Մարօն հանդիպեց իր երեխայութեան երկու ընկերուհիներին, նրանց միմեանց հետ փաթաթեցիք, նրանց պարզ ու անմեղ սրտերի արտահեղութիւնը, նրանց անկեղծ շրթունքների մրմունջը բարձր է գրչի զօրութիւնից. այդ միայն պէտք է տեսնել եւ զգալ:

Հայկական աղջկայ սրտի մէջ կայ մի բան, կատարեալ հրեշտակային, որ մնում է միշտ անհասկանալի հասարակ մահկանացուների համար: Նա այնպէս մաքուր եւ սրբազան է, որպէս մի անարատ աստուածութիւն. նա արտափայլում է իր ջերմ լուսով, նա բուրում է իր անուշ հոտաւետութեամբ, բայց նա միշտ մնում է անշօշափելի...

## ԼԷ. ԶՈՒՐԴԸ ԶՐԻՍՏՈՆԵԱԿԱՆ ՍՐԲԱՐԱՆԻ ՄԷՋ

Աստուծոյ լոյսը բացոցեցաւ: Օրը կ'իւրակի էր: Առաւօտեան մայրս եկաւ մեզ մօտ, մենք բոլորս միասին գնացինք վանքը ժամ: Մեր վրանումը մնաց միայն պառաւ խաթունը, մատաղն եփելու համար:

Ուխտաւորների բանակը գտնուում էր իր ջերմեռանդ բարեպաշտական վրդովմունքի մէջ: Ամէն տեղ երեւում էր շարժողութիւն, ամէն տեղ եփ էր գալիս բորբոքած հաւատքը, իր բոլոր աստուածային կարողութեամբ: Բազմութիւնը շտապում էր դէպի վանքը պատարագ տեսնելու եւ սուրբ տիրամօր գերեզմանը համբուրելու: Այն խառնիճաղանջ ամբօխի մէջ կարելի էր տեսնել ամէն երկրի հայեր, ամենատեսակ գլխարկներով, սկսած օսմանլրի ֆեսից, քրդի ապարօշից, միւսերէ պարսկի երկայն, մորթե գդակները: Կանաչքը Նոյնպէս զանազանուում էին տեսակ-տեսակ հագուստներով. ամէն երկրի կիւնը ընդունել էր տիրող ազգի կանանց զգեստի ձեւերը: